

東
華
續
錄

東華續錄

同治九十一

臣王先謙敬編

臣張式恭恭校

秋七月己丑朔諭軍機大臣等杜嘎爾奏催隊進剿並偵探賊竄情形一摺前據定安奏賊匪已竄出烏喇特旗界五六百里以外此次杜嘎爾聲稱逆匪見竄烏喇特公中旗交界之什巴克台地方是否偵探未確抑係賊蹤回竄著杜嘎爾懷遵疊次諭旨迅催吉爾洪額訥蘇肯等跟蹤追剿力挫兇鋒不得藉口駝馬稍涉遷延致與賊匪相左任令遠颺貢果爾既經調營會剿所有臺站糧路杜嘎爾務當飭令在防官兵妥籌保護毋稍疏虞前據慶春奏圖固里克等臺業經招集並籌備駝隻將各臺存積米糧依次起運是糧道已經通暢著杜嘎爾派員迎催以濟軍食將此由五百

里諭令知之○諭馮子材康國器奏撥隊出關剿賊獲勝見籌辦理情形一摺馮子材督軍馳抵龍州聞越南匪勢猖獗卽撥隊出關分道進剿攻克長慶府城擒斬逆首趙雄才擒平賊巢十餘處禿山和樂賊巢亦一律掃除疏通北甯諒山餉道剿辦甚爲得手惟越南未能截擊致鄧建新等敗匪竄向太原其蘇轡漢曾亞治等股復盤踞東潮縣一帶勾結竄擾均屬可虞馮子材康國器見已畱營長慶等處遙爲聲援並調兵堵剿搜捕所籌尙是我兵見在雖未便窮追仍當相機援應屆時可以進兵卽當協力夾擊將各股敗匪盡數剿除以綏藩服匪徒如此猖獗越南何以毫無布置任其奔竄著卽知照該國嚴密堵禦毋令該匪闖入腹地馮子材尤當嚴飭出關將士及畱防兵丁不可稍有擾累並隨時與該國官吏聯絡聲勢庶彼此情意相洽方易奏功東潮近接欽州恐

爲廣東邊患著端麟檄飭洋面師船及該地方文武一體嚴防毋
令蘇軻漢等股潛入滋擾此次剿賊出力員弁准其擇尤保獎以
示鼓勵黔省四寨敗竄苗匪業經粵軍會合黔軍擊退李高脚一
股已敗遁丹江都勻交界一小五戎地方著康國器飭令孔憲隆
督軍嚴防邊隘搜捕餘匪儻再有匪黨竄入粵邊卽著併力截擊
以固疆圉黔省下游漸次肅清正籌及上游軍務著曾璧光酌度
機宜知照馮子材等撥兵助剿劉長佑抵任後卽著與馮子材和
衷商辦以資得力疊次剿辦苗匪出力員弁著准其擇尤保獎毋
許冒濫將此由五百里諭知瑞麟劉長佑曾璧光馮子材並傳諭
周達武康國器知之○庚寅諭內閣朕叔祖惠端親王之子奉恩
鎮國公奕詢在上書房讀書有年持躬謹飭旋經派令在內廷行
走並管理中正殿事務俱能恪恭將事勤慎有加前因患病疊經

賞假調理方冀日就痊愈恩眷長承遽聞溢逝悼惜實深著賞給陀羅經被派孚郡王卽日帶領侍衛十員代朕前往奠醊加恩由廣儲司賞銀三千兩經理喪事所有飾終典禮著各該衙門察例具奏○壬辰諭軍機大臣等庫克吉泰奏據咨甘回東竄豫籌防範一摺多倫諾爾爲熱河西北門戶地方富庶素爲賊所垂涎庫克吉泰因直隸咨文聲稱探聞賊匪有分犯庫倫多倫諾爾之說揀派員弁馳往多倫廳常川坐探並飭豐甯縣大閣司會同營汛調集兵團嚴爲防範復由熱河八旗派定官兵一千名俟有警信馳赴交界駐紮所籌尙屬周密卽著該都統督飭在事員弁認真偵探嚴密防範不得以賊蹤尙遠稍涉懈弛至古北口練軍一千疊經諭令迅赴庫倫防剿此次庫克吉泰摺內聲稱李鴻章見飭該軍趕緊出口協剿等語是此項官兵卽可啟程卽著李鴻章檄

飭都司賈吉齡統帶前進迅速出口毋稍遲延此時潰散各臺已
經設復卽或糧運緊要駝馬不敷周轉而該練軍行抵張家口後
亦當以次漸進與察哈爾派出各隊聯絡聲威藉截賊匪紛竄之
路著慶春斟酌辦理多倫東北克什克騰地方兵力單薄庫克吉
泰見咨昭烏達卓索圖兩盟長將上年古北口撤回防兵二千操
練整齊以備協剿卽著理藩院轉飭昭烏達卓索圖兩盟長一體
遵照豫備聽候徵調庶免臨時延誤正在寄諭間據杜嘎爾奏吉
爾洪額等追賊至烏喇特旗所屬之布拉特地方擊賊獲勝殲斃
二百餘名生擒十餘名見飭該協領等乘勝追剿等語此次吉爾
洪額等奮力剿賊大挫兇鋒洵堪嘉尚潰匪見已無多著杜嘎爾
飭令前敵各軍探明賊蹤悉數掃蕩前據定安奏此股匪徒約有
二千餘人見分兩股竄擾等語此次吉爾洪額等擊敗之賊係屬

何股其餘見竄何處尙有若干著定安杜嘎爾確切偵探視賊趨向飭令各軍妥籌防剿前此札齊魯克齊伯克瓦齊爾殲斃賊目褻創力戰已諭令張廷岳等從優保奏此次杜嘎爾奏稱剿賊出力之札奇魯克齊巴奇瓦齊爾是否卽係其人著該副都統遇便奏聞其所部官兵卽著張廷岳等擇尤請獎仍令該帶兵官確探賊蹤會合吉爾洪額等乘勝進擊並著杜嘎爾飭令達爾濟迎頭兜剿淨掃逆氛將此諭知理藩院並由五百里諭令李鴻章定安庫克吉泰慶春杜嘎爾張廷岳阿爾塔什達知之○吏部以大學士瑞常瑞麟應定何殿閣請得旨瑞常著授爲文華殿大學士瑞麟著授爲文淵閣大學士○以徐桐翁同龢爲內閣學士

徐桐由太僕寺卿遷

○草倉河復溢諭恩承等速籌修築○甲午諭軍機

大臣等前因甘肅甘涼肅一帶兵力單薄諭令左宗棠穆圖善派

兵截剿茲據奏稱見在東西兩山尙未肅清南路亦須畱兵駐紮
西甯河州逆巢未掃左宗棠見駐靜甯距西路遙遠穆圖善所部
兵勇駐守省垣分紮金縣等處均難抽撥請俟河西肅清零匪按
除淨盡再由左宗棠撥兵前赴西路等語甘涼肅地方緊要亟應
妥爲設防卽著豫師瑞雲就見有兵力於各該處緊要隘口嚴密
防堵遇有匪徒竄入卽行實力剿擊毋任該匪蔓延惟豫師瑞雲
所部兵力無多如有大股竄入殊難堵禦仍著左宗棠穆圖善妥
籌兼顧如西路緊急務於無可抽撥之中設法派兵赴援以資得
力將此由五百里各諭令知之○永定河復決○丙申諭軍機大
臣等左宗棠穆圖善奏回匪竄擾北山官兵截剿獲勝一摺北山
秦旺川一帶產糧最廣見值收穫夏麥之際該匪時出竄擾雖經
各路官軍截剿獲勝惟據生擒賊供有米拉溝撤回勾結陝回二

千餘人分股四竄意圖搶糧等語尤應先事豫防力爲保護著左宗棠穆圖善督飭各軍分路確探何路有賊卽向何路截剿務期護民收穫毋資盜糧穆圖善見已馳往北山著卽相機調度並將該處駐紮馬隊重加整頓以期得力將此由五百里各諭令知之○諭定安奏追剿烏喇特旗竄匪獲勝一摺賊匪竄擾烏喇特旗界內避兵而行提督金運昌探悉賊蹤派隊追剿於上月十六日擊賊於奔巴廟斬殺殆盡並在察洪噶爾廟內圍剿分竄之賊兩次殺斃悍賊三百餘名生擒十餘名正法卓勝營剿賊奮勇甚爲得力著定安擇尤保奏以示鼓勵賊目韓阿渾是否殲斃零匪見逃何處仍當確切查明認真搜捕毋令漏網前據杜嘎爾奏吉爾洪額等在烏喇特旗所屬之布拉特地方擊賊獲勝是烏喇特旗界內賊股不一此外究有幾股見在何處竄擾仍著定安杜嘎爾

懷遵前旨確探具奏一面飭令各軍偵探兜剿迅掃逆氛將此由
五百里各諭令知之○予烏喇特旗降亡遊擊戴占元祭葬世職
○丁酉諭軍機大臣等李鴻章奏日本議約漸有端倪並將往返
信函鈔錄呈覽一摺日本與中土最近又自託於同文之國見在
議立修好條規通商章程自不必沿襲泰西各國舊套該督督飭
應寶時陳欽與該使臣反復辯論大致均已允服遵照惟章程內
請添凡兩國准予別國優恩及有裁革事件無不酌照施准一條
仍是一體均霑之意應寶時等覆該使臣信函頗足折服其心卽
著李鴻章飭令應寶時等力持定見悉心開導總期妥爲酌定以
示區別而杜弊端並將辦理情形隨時具奏將此諭令知之○戊
戌諭軍機大臣等杜嘎爾奏追剿另股賊匪獲勝情形並派員保
護糧路各摺片吉爾洪額等前在布拉特地方剿敗賊匪後復探

得正南百餘里山谷中另有賊股當經追至阿巴爾干河擊斃賊匪一百餘名敗竄無多所有出力人員准其擇尤保奏吉爾洪額等兩次所勦賊股均不過二三百人昨據定安奏卓勝營追勦奔巴廟等處之賊亦止三百餘人是賊數並不甚多疊經官軍擒斬漏網無幾此外賊匪究竟尙有幾股仍著定安杜嘎爾確切偵探賊蹤所在督飭各軍迅速兜勦趁此初秋之際務將各股竄匪悉數撲滅剋期蒞事若稍涉遲延轉瞬風雪嚴寒勦辦又形棘手杜嘎爾因馬匹疲乏遠調不及請於察哈爾商都太僕寺牧羣調撥應用著慶春迅調臚壯馬五百匹解赴杜嘎爾軍營俾資進勦喇嘛伊達木捐輸馬匹甚屬急公著杜嘎爾將該喇嘛從前曾否得有獎敘查明具奏後再交理藩院覈給獎敘臺站爲糧運所經關繫緊要察哈爾所派駐紮臺站官兵卽著杜嘎爾責成達爾濟車

德恩速赴濟斯洪果爾安爲管帶保衛糧道不可稍有疏虞將此由六百里各諭令知之○己亥諭軍機大臣等張廷岳等奏蒙兵追剿賊匪獲勝等語據奏伯克瓦齊爾會同吉爾洪額等於六月十八日在烏蘭察布盟烏喇特公遊牧之塔拉布拉克地方剿賊獲勝與本月初四日杜嘎爾奏報情形大略相同惟餘匪尚有百餘名窮蹙逃散亟宜跟蹤追剿著張廷岳阿爾塔什達飭令和貝貝勒幹丹丹準車林迅速帶兵前進會合伯克瓦齊爾等將此股敗匪悉數殲除杜嘎爾亦當督飭吉爾洪額等與庫倫派出官兵聯絡聲勢會合擊剿務絕根株昨又據杜嘎爾奏吉爾洪額等追剿另股賊匪至阿巴爾干河斃匪一百餘人敗竄無多此外賊匪究竟尙有幾股張廷岳等務當確切偵探各飭官軍視賊所向實力兜剿毋稍遲緩將此由五百里各諭令知之○以紹祺爲內閣

學士

由詹事遷

○庚子予直隸陣亡縣丞馮義誠原籍建祠○壬寅以

涂宗瀛爲湖南按察使

由江蘇蘇松太道遷

○甲辰諭軍機大臣等成祿奏

撤回潛結西河回匪肅州防剿緊要請飭督臣撥兵會剿一摺肅州城內客居撤回二千餘人向不安分近復布散流言以馬化澂爲口實搖動眾志肅城土著回民亦爲所惑見又暗中勾結西河回匪零星入城人數益眾若不認真防剿不足以遏亂萌成祿見將出關三營調回以一營駐防金塔二營力扼臨水要隘並分兵防守高臺撫彝以顧後路運道卽著該提督就見有兵力防剿兼施毋令肅城稍有疏失前經疊諭左宗棠派撥勁旅馳往甘涼肅一帶截剿竄匪左宗棠覆奏摺內有西路相距遙遠目前無兵可撥擬俟進規河州卽派兵赴西路剿賊等語此時肅州情形危急該督已移營進規河州著卽酌派勁兵選派得力將領統帶鼓行

而西相機進剿以保關內要地不得稍涉遲誤成祿兵餉久絀著戶部查明該提督指撥專款各省已解若干未解若干分別咨催迅速起解毋令遲延成祿後路糧臺著左宗棠飭令署甘涼道蕭宗幹總司其事所有各省解到餉銀等項卽由蕭宗幹設法護運以資接濟成祿另片奏署甘肅提督楊占鼐辦事因循輿情不治請催馬德昭迅速赴任等語楊占鼐既不得力卽著左宗棠查明貽誤情形據實參奏前據李鶴年奏潼關防務緊要請畱馬德昭駐紮兼顧當經准照所議暫緩西進見在陝省安謐豫防已鬆自應飭該提督迅赴本任以重職守卽著李鶴年傳知馬德昭遵行成祿又片奏投誠陝回賽玉城等因乞假未允擅自潛逃由南山一帶遁回河州等語該降眾狼子野心難保不沿途滋擾著左宗棠飭令甘涼所屬地方員弁嚴防截剿並著成祿督飭明春胡可

均等於臨水及附近南山一帶加意防堵毋稍疏懈將此由六百
里各諭令知之○申諭李鴻章籌辦直隸賑務○乙巳諭軍機大
臣等總理各國事務衙門奏俄國西悉畢爾地方官由銅綫致該
國駐京使臣信函內稱七河省巡撫廓派兵前往伊犁與達蘭察
接仗獲勝五月十七日克復伊犁城池生擒頭目該國由銅綫寄
信詞意簡略並無詳細情節亟應先事豫籌等語伊犁久爲賊踞
因關內未靖兵力兼顧不遑今俄國業已帶兵將該城收復此事
關繫甚重亟應豫爲籌畫以弭釁端著金順奎昌多布沁札木楚
瑛榮文碩確切查明俄國官兵進紮伊犁是否確實烏科兩城距
伊犁程途若干是否須由塔爾巴哈台前進沿途有無賊蹤迅速
具奏榮全本署伊犁將軍責無旁貸該署將軍曾任伊犁領隊大
臣嗣復親往俄界辦理一切事件頗屬勇往且於該處情形又極

熟悉著卽飭赴伊犁晤俄國帶兵官七河省巡撫廓後將伊犁城收回妥籌布置中國有人前往經理庶俄人無所藉口其應如何派兵前往駐守及由何路設法轉運糧餉並著榮全會商金順奎昌多布沁札木楚瑛檠文頤迅速具奏聞俄國並欲派兵由伊犁收復烏魯木齊文麟等前奏烏城逆回投順安集延逆首馬仲遞稟乞撫擬設法羈縻令該帕夏投誠交城至令馬仲妥得璘等赴哈派孔才赴西路相機收復奇古濟木薩等語見在如何籌辦已否就緒若能將烏魯木齊先行收復免致又費周折景廉久在西疆於各該處事務熟悉卽著酌帶兵勇規復烏魯木齊事機緊迫該辦事大臣等務當綢繆未雨先事圖功哈密防守緊要卽責成文麟悉心籌畫毋稍大意巴里坤距烏魯木齊不遠景廉到彼後伊勒屯務當與之聯絡聲勢以顧大局所有榮全景廉所部餉需

著戶部迅撥有著之款以資接濟總理各國事務衙門摺均著鈔給閱看○諭劉銘傳奏因病請假離營調理一摺覽奏實屬廑繫見在秦徽鹽固一帶游氛漸少陝省無須多兵譚仁芳一軍卽著畱紮該省以資彈壓該提督所部各軍著毋庸撤遣本日據總理各國事務衙門奏俄國派兵於五月十七日代爲克復伊犁城池已諭令榮全馳往籌辦惟聞該國尙有派兵規取烏魯木齊之信本日已諭景廉成祿先後帶兵前進相機規復烏魯木齊惟景廉成祿帶隊無多亟須精兵勁勇接續西行庶足以壯聲威該提督忠勇性成情殷報效且以有用之兵置之無用之地尤屬可惜著卽督率所部由乾州鼓行而西繞出蘭州之北由甘涼肅一路出關節節前進爲收復新疆各城之計刻下河州西甯逆氛未淨關外如烏魯木齊等城又不能任令外人從而生心該提督惟有力

疾從公專任其難以副朝廷厚望○諭據劉銘傳奏舊疾舉發請假離營調理一摺該提督以陝西見無戰事南路防務亦鬆欲率所部東行與曾國藩李鴻章酌商遣留固爲節省餉需起見惟以有用之兵置之無用之地已屬可惜劉銘傳忠勇奮發年力正強更當爲朝廷出力本日據總理各國事務衙門奏俄國已派兵代爲收復伊犁該國詢問如何辦理等語且聞該國尙欲帶兵收復烏魯木齊因諭署伊犁將軍榮全帶隊前往伊犁收回城池並諭景廉成祿先後統率兵勇規復烏魯木齊一面寄諭劉銘傳令其督率所部由乾州鼓行而西繞出蘭州之北由甘涼肅一帶出關節節前進爲克復新疆各城之計庶於大局有益至該提督全軍餉項關係緊要卽著曾國藩李鴻章妥速籌商寬爲豫備源源接濟以利師行總理各國事務衙門及劉銘傳摺各一件均著鈔給

閱看○丙午命江蘇浙江各採買米二萬石備直隸賑需○丁未諭軍機大臣等李鶴年奏沁河漫口及漫水趨近關黃埝各摺片豫省河內縣所屬之徐保村本年沁水盛漲復因大雨長至九尺有餘該縣小王莊無工處所漫溢過隄衝刷二十餘丈見在水勢趨至關黃埝後身情形甚爲喫緊亟應設法保護著李鶴年飭令河北道督率廳汛各員趕緊分別疏消保護黃河隄岸並將沁河漫口堵築毋稍遲緩一面將賑撫事宜迅速籌辦毋任沿河居民流離失所其武涉縣之原村等處埽段據稱情形亦甚喫緊該撫務當豫籌防範以保無虞將此諭令知之○戊申左宗棠奏據固原提督雷正綰記名提督周紹濂陝甘道黃鼎報稱周紹濂訶知逆目李汶虎楊百成等竄至距半角城一百五十里之磨盤水地方混入米包山撫回楊萬春金忠明等股內正籌辦聞忽於六月

初八夜聞李汶虎率逆騎數百由西山東竄雷正綰周紹濂黃鼎各率所部馬步隊伍出擊初九日黎明至苦水泉尾果見逆騎東竄官軍攔頭截擊槍轟矛刺斃賊甚多賊敗潰反奔追至五家山李汶虎率黨死拒官軍奮力齊追斬步賊七八十名馬賊三十名轟斃者尤眾周紹濂所部生擒李文虎楊天朝等八名雷正綰黃鼎所部生擒賊目馬二楊耳環子等數名餘賊紛紛潰竄追之不及訊據李汶虎供稱五月初六日由河州帶馬隊九十名出竄到楊萬春處伏匿今日接仗楊萬春楊百成金忠明一併在內等語臣查李汶虎楊天朝馬二楊耳環子等逆均係逋誅積匪批飭軍前正法梟首示眾楊萬春金忠明等就撫復叛罪不容誅飭令迅速勦辦以昭炯戒雷正綰周紹濂十一日會軍繼進分道直擣米包山一帶賊巢官軍齊抵米包山賊猶未覺卽縱隊痛擊拔獲旗

械號衣軍火甚多賊巢無得脫者其先時出巢劫掠之賊百餘名聞警回援又經官軍擊敗訊生賊供李汶虎眷口尙在河州本日官軍所殺皆楊百成楊萬春金忠明丁萬明之黨內有馬化澂戚屬譚竹林亦已伏誅又據提督楊世俊稟稱駐三陽川之奇捷平西營務處副將楊德俊探知秦州平南川有馬步賊東趨甘泉寺即帶馬隊三旗會合田連考步隊尋縱追擊十一日於秦州麻山頭地方始與賊遇馬隊斃賊數十名追奔六十里至麥積巖兩山峻削對立賊急棄馬上山官軍亦改步齊登斬賊數十名餘賊鼠竄因天晚雨驟覓地暫憩十五日黎明追七十里至黎子園又斃尾賊數十名此股略盡矣訊據生擒賊供鞏昌回目劉洪逃赴河州後茲繞由安定潛來謀劫糧運見已死亡大半劉洪亦經官軍陣斬又駐渭東之平西營都司王勇於十五日調知賊與平西後

營接仗卽出隊馳剿至汪家衙與後營夾擊賊卽敗退追二十餘里斃賊多名餘賊四散生擒賊目閻得順馬遇澀訊係小頭目馬五所帶已爲官軍擊敗同時提督張仲春亦探有步賊百餘竄至閻井一帶卽出隊向馬塢鎮截剿該逆聞風折竄岷州適駐岷之副將張登桂於十五日帶隊來駐洛門領糧遇賊於岷屬大坪賊方伏山凹似圖劫運張登桂分隊按剿斃賊十餘名賊遂狂奔十六日竄至距馬塢六十里之百家莊張仲春卽於三鼓潛師掩擊五鼓抵百家莊乘賊酣睡將全股圍斬殆盡十七日探知前在禮縣屬擊敗之賊百餘騎又由西河境繞道固城有竄馬塢之勢張仲春飭信營回駐馬塢自帶禮義兩營躡擊賊見官軍卽飛向馬塢竄去官軍夾擊轟斬不計其數賊翻山亂竄時已四更矣山霧冥蒙不辨行徑次日探之則已紛紛逃竄無蹤遂於二十日回防

其階州勦辦給匪情形臣已陳明在案續據署階州知州洪惟善

稟稱縣丞李支瑞探得史家溝有窩藏給匪蹤迹卽親率隊伍馳往接捕匪目史夢虎遂竄匿何中幅堡中並恃其黨趙金幅夥同助逆李支瑞商請哨官彭德沅周正秋賀俊德等率隊於五月初五日抵何家溝傳諭何中幅令其縛匪平堡繳械免死該匪竟敢抗拒官軍鏖戰自辰至申始將後卡攻破斬匪八名而前卡懸巖峭壁力無所施逐日輪攻互有傷損初十日該縣丞令各隊執擋牌直抵卡外積薪縱火當毀卡前礮樓匪勢益形窘蹙十一五更潛竄出卡官軍圍擊斃悍匪三十餘名生擒要逆趙金幅等數名據趙金幅供史學虎已於前兩月逃往白馬關詢段世才蹤迹則堅不吐實當將該逆正法並移知白馬關州判嚴拏史學虎訊辦臣維中南兩路疊次追勦擒斬頗多勦辦給匪亦多擒馘惟首逆

狗齒身馬彥瀝及縉匪匪目史學虎等尙未就殲見在仍飭確探
迅勦務盡根株又奏鹽固一帶零匪經疊次搜獲所餘無幾惟數
十騎一起十數騎一起者西山以內倏隱倏見時復有之緣地闊
山荒煙戶絕少零賊見兵卽逃轉盼無蹤搜捕難於求速也臣見
咨雷正綰撥所部馬步九營分紮固原迤北至中衛南境飭平慶
涇道魏光燾撥所部馬隊一起步隊五營延紮固原迤南至平涼
旁接隆德以資雕勦而護餉運見已到防記名提督徐文秀已進
駐會甯劉明燈已進駐安定臣拜摺後卽率親兵進駐靜甯州到
靜甯築營後當卽率輕騎馳抵安定狄道一帶察酌情形督令諸
軍分道速進 上諭軍機大臣等雷正綰等軍追捕西北逸賊擒
斬賊目李汶虎等多名楊世俊所部截勦秦州勦回並在渭源所
屬汪家衙擊賊獲勝將回目劉洪等陣斬其分竄岷州之賊亦經

張仲春等督兵截擊擒斬頗多至階州縉匪亦經該處員弁率隊進攻破其卡壘殲斃悍匪數十名卽著左宗棠嚴飭在事各軍認真接剿並將在逃首逆狗齒牙馬彥瀝及縉匪史學虎等悉數擒獲淨絕根株左宗棠進規河州見令雷正綰撥馬步九營魏光燾撥步隊五營分紮固原南北各路以資雕剿而護餉道令徐文秀駐會甯劉明燈駐安定該督自率親兵進駐靜甯所籌均尙周密卽著於行抵靜甯後馳赴安定狄道一帶察看情形督率諸軍分道速進擒渠掃穴迅奏膚功以慰塵繫將此由五百里諭令知之○兩廣總督兼署廣東巡撫瑞麟奏遵查粵東省章官山葬墳以橫直二丈爲限循行已久此次駱秉章執奏專就無力升科者而言意在爲貧民少畱餘地無如粵東地狹人稠墳塋櫛比若以定例相繩恐小民無地開穴轉生事端見經體察輿情參覈例案所

有官山墳地無力升科者應仍遵同治五年部議以橫直二丈爲

限有力升科者卽按定例庶民墾地九步穿心十八步爲率雖有

餘地不得逾制其不及九步者聽以昭畫一而杜紛更下部知之

○以河南汜水縣城被水諭李鶴年撫恤災民○御史張景靑疏

請撫綏東南流亡屯墾陝西荒地 上嘉納之○飭四川等省迅

解滇餉○以蒯賀蓀爲浙江按察使

由河南南汝光道遷

○已酉諭軍機大

臣等前因總理各國事務衙門奏俄國帶兵將伊犁城代爲收復

並欲前往收復烏魯木齊當經諭令榮全景廉分赴該兩城速籌

布置所有餉需諭令戶部迅速籌撥茲據該部奏稱榮全軍餉擬

由部庫先行撥給庫平銀十萬兩解交察哈爾遞解景廉軍餉先

由西征糧臺就近借撥銀十萬兩星速解往等語伊犁烏魯木齊

事機緊迫榮全景廉兩軍馳赴該城刻不容緩非餉需應手不足

以利師行所有部撥原庫平銀十萬兩卽著戶部知照順天府立卽委派妥員解至察哈爾慶春於此項餉銀到時卽行派員妥速遞解榮全帶兵起程不能稍緩前次部撥烏科兩處餉銀各十萬兩見在存項尙多該署將軍師行迅速卽著於該兩城存項內就近提用一俟部餉解到再行歸款此項餉銀卽著奎昌多布沁札木楚瑛榮文碩撥交榮全應用景廉帶兵規復烏魯木齊軍情急迫餉項甚關緊要若由部撥及外省指撥仍恐緩不濟急著左宗棠飭令袁保恆卽由西征糧臺內先行措撥銀十萬兩星速解赴景廉軍營以應急需西征糧臺距該幫辦大臣軍營尙近左宗棠等惟當迅卽起解毋稍稽遲並著何璟於應解本年京餉內劃撥銀十萬兩解赴西征糧臺歸款所有榮全景廉續用餉銀著戶部再行籌撥以資接濟榮全景廉各當迅赴戎機毋稍遲誤將此由

六百里諭知左宗棠榮全奎昌多布沁札木楚瑛榮文碩慶春景
廉何璟並傳諭袁保恆知之○賞榮全赴伊犁治裝銀二萬兩並
頒帑銀三萬兩爲犒賞俄兵之用○癸丑諭李瀚章等迅解新疆
欠餉○予江西陣亡道員帥遠燁建祠布政司理問帥疇附祀○
甲寅諭內閣李瀚章郭柏蔭奏前任督臣勳績最著懇請建祠一
摺原任大學士官文任湖廣總督十二年當地方兵燹之餘能持
大體與歷任巡撫和衷共濟恢復全楚並次第舉行善政民氣得
漸復元該省紳民至今稱頌著照所請卽將湖北前建胡林翼專
祠改爲官文胡林翼合祠列入祀典飭令地方官春秋致祭以彰
忠藎而順輿情○以德椿爲內閣學士由奉天府府尹遷○乙卯諭軍機
大臣等都興阿奏陸續拏獲盜匪並派隊馳往邊外剿捕一摺奉
天昌圖廳地方爲宵小出沒之區盜匪烏痣李等狡猾異常久稽

顯戮見復紛出竄擾據諾林丕勒等陸續報獲盜犯多名著飭嚴行訊辦盡法懲治榆樹臺孤家子四平街等處均有賊股擾掠亟應迅速撲滅以清盜源都興阿見派索倫多爾札布帶隊馳赴昌圖調沙克都林札布等馬隊出邊會剿並飭諾林丕勒及同知張鼎鏞等併力勦辦卽著飭令派出各軍認真搜捕昌圖界連吉林並著奕榕卽行派隊馳赴該處會合兜拏該將軍等務當嚴飭在事各員將盜首烏忠李劉疤拉脖子等悉數弋獲毋任再行漏網並將匪黨搜除淨盡以靖地方法庫邊門等處都興阿飭該防兵認真巡緝毋稍疏懈將此由四百里各諭令知之○鄭敦謹以病免以龐鍾璐爲刑部尙書李鴻藻爲左都御史調鮑源深爲戶部右侍郎以夏同善爲兵部右侍郎

由詹事遷

○丁巳諭軍機大臣等吳

棠奏川省邊隅腹地時勢多艱請暫畱帶隊得力總兵一摺前准

曾璧光等奏請將李輝武一軍調赴黔省助剿嗣據吳棠奏畱該軍兩營駐紮大安驛以固川邊其餘三營仍令赴黔茲復據吳棠奏稱湖南會匪滋事首逆未擒餘氛尙熾黔江彭水邊界見在籌防貴州畢節所轄之觀音洞有匪首羅么糾集積匪與雲南鎮雄所轄之豬拱箐遺孽復萌勾結爲患該處均近接川邊必須分兵助剿甘省之徽兩等處與川接壤時虞回匪竄擾非兩營所能抵禦李輝武帶隊得力請准暫畱等語川省邊隅腹地既須增兵卽著照吳棠所請將李輝武暫畱川省以資防剿該總兵見已拔隊赴黔著吳棠飛檄截畱妥爲布置黔省剿辦上下游股匪亦需兵力吳棠已於武字右軍酌撥兩營入黔協助卽著曾璧光周達武於該營到黔後酌量調遣以資得力該營月餉吳棠當寬爲籌撥毋令缺乏觀音洞豬拱箐係滇黔交界處所既有匪徒竊發亟宜

及早撲滅免致蔓延著劉嶽昭岑毓英曾璧光酌量派兵前往搜捕並責成各該地方官查拏奸宄毋任伏莽潛匿以靖地方將此由四百里諭知吳棠劉嶽昭岑毓英曾璧光並傳諭周達武知之○戊午諭軍機大臣等曾璧光奏官軍擒斬首逆疊克堅巢都勻漸次廓清一摺貴州官軍自剿敗竄匪李高腳後總兵何世華等復將都勻積年巨匪柳添沈殲斃乘勝掃蕩勻郡西北賊壘立解城圍轉戰東路馳剿東南踏平楓香獠家斑竹園等處壘寨擒斬甚多招降乞撫者不計其數見在都勻四面漸次廓清卽著飭令各軍將敗殘餘匪悉數殲除一面慎選賢能守令辦理善後務將招降各寨妥爲彈壓安撫毋令再生事端楚軍見由螃蟹等處進剿與黔軍相距不遠該撫等卽飭將士會合楚軍節節兜擊以靖苗疆李高腳受傷逃遁並著飭令帶兵各員及地方文武一體躡

拏務獲毋令漏網將此由五百里諭知曾璧光並傳諭周達武知之

八月己未朔諭軍機大臣等左宗棠穆圖善奏豫師奏礮伯勦匪獲勝南川被匪竄擾左宗棠穆圖善奏堵擊西甯賊匪各摺片陝匪崔三等竄擾礮伯之勝番溝等處並撲礮城經官軍連日進勦將賊擊退平戎一帶肅清勦辦尙爲得手在事尤爲出力各員著左宗棠穆圖善豫師嚴飭各軍探明賊蹤合力搜捕務絕根株逆首崔三是否實係擊斃該大臣等確查具奏西甯竄匪四出竄擾窩洞等處雖疊經擒斬匪勢仍屬蔓延左宗棠等務飭派出官軍分投勦辦迅掃逆氛並檄飭總兵黃武賢嚴密布置務將威遠一帶完善之地妥籌保全至金縣平番及省城附近各隘著穆圖善飭令帶兵將弁實力巡防毋稍大意成祿在肅州收撫陝回潰叛東

下甘涼二府戒嚴著左宗棠穆圖善卽飭王仁和等加意防剿如兵力尙屬不敷並著左宗棠酌量撥兵策應西甯南川一帶村莊時被賊匪焚掠豫師以兵力難分已函商左宗棠撥軍助剿卽著該大臣酌撥得力隊伍前往協助豫師卽飭練總張煥奎先行派隊救援以資保衛甯靈一帶雖經肅清惟聞甘涼回匪勾結西甯漢回屢擾平番古浪等處日久無可掠食或由古浪之大靖土門越中衛而出邊或由鎮番竄出邊外肅州之回亦時由金塔寺出邊竄擾若不豫籌堵截恐各匪紛紛北竄必致滋蔓難圖刻下大軍進規河州若以一軍分紮鎮番金塔寺等處斷賊出邊之路以一軍駐紮平番扼西甯賊匪出竄兼護秦旺川糧道俾大兵專力河州免至牽掣似於局勢較爲周密著左宗棠酌量情形妥籌辦理將此由六百里各諭令知之○辛酉兵部右侍郎夏同善疏請

敦節儉廣賑濟開言路清庶獄 上嘉納之○甲子以京畿久雨

上詣 大高殿祈晴○乙丑諭軍機大臣等前有旨將劉長佑

調補廣西巡撫該撫接奉此旨計已馳抵新任接篆視事矣粵西
久遭兵燹地瘠民貧年來吏治廢弛地方官復狃於積習一味因
循必須封疆大吏整躬率屬破除情面隨時大加懲創方足以挽
頹風劉長佑向來辦事尙能認真惟性情過於寬厚若不濟以剛
斷遇事優容使人知感而不知畏則有不肖官吏巧於嘗試必致
故態復萌劉長佑當振刷精神悉心整頓凡興利除弊察吏安民
諸務期於法立令行雖不必以操切爲能要不可以慈柔貽誤方
爲不負委任該撫前在直隸所帶楚省將勇均不得力且多滋事
此次入粵距湖南原籍甚近如有懇請隨同報效情事萬不可允
其所請任令赴粵致滋紛擾如須招募勇丁儘可就地取材經費

既省約束亦易且與該省各營兵勇亦復相習儻帶兵將領乏人著該撫於馮子材軍營商酌調派以資得力將此諭令知之○諭劉銘傳奏復陳兵勇道路情形勢難出關並請賞假離營養病一摺新疆遠在西陲朝廷本欲俟甘省肅清再行籌餉籌兵力圖大舉近因伊犁地方已經俄國代爲收復並有代規烏魯木齊之說若不迅赴事機爲先發制人之計竟令鄰國得遂其謀以後更難措手是以特命劉銘傳率旅西行爲國家力任其難建茲偉績茲據該提督所陳各節河湟未靖轉餉艱難江皖之人又不宜衝寒涉遠自係實在情形劉銘傳又因傷疾舉發亟須靜心調養覽奏之餘曷勝廕念惟邊外事機緊迫萬不可置爲緩圖准軍素稱節制之師且非劉銘傳居中調度亦難兵將一心劉銘傳著賞假一箇月在營安心調理一俟病體就痊卽行督率所部陸續西進由

甘涼一帶轉戰而前卽在肅州屯紮無庸出關庶聲威較壯成祿等軍卽可一意西行不至跋前疐後於大局較有裨益該提督軍行餉需及應於何處設立轉運糧臺之處並著斟酌情形詳晰奏明一面與曾國藩李鴻章酌度辦理將此由五百里諭令知之○丙寅左宗棠奏竊臣欽奉寄諭肅州一帶關繫緊要著左宗棠迅卽調派勁旅前往扼剿竄匪替出成祿一軍出關剿賊劉銘傳所部已諭令鼓行而西繞赴蘭州北路由甘涼肅一帶出關節節前進爲收復新疆各城之計左宗棠身任兼圻本應統籌全局况鎮迪一帶係該督所轄尤當妥籌兼顧穆圖善如有可撥之兵並著會商左宗棠酌量調派以資厚集欽此臣跪聆之餘曷勝欽佩以隴中局勢而論自宜先規河湟杜其紛竄然後壹意西指分兵先扼玉關斷其去路乃策全功此時興師遠舉尙非穩著然此時固

有未可拘執者臣接奉諭旨已飛緘穆圖善詢其能否派隊一面

咨劉銘傳酌定進兵道路一面飛飭記名提督徐占彪統所部馬

步十二營由靖遠防所取道蘭州踰涼甘兩郡以抵肅州緣徐占

彪勇敢能戰所部多百戰之餘尙堪當一路之寄而該軍餉事已

經清算臣復擬資以兩月滿餉冀可收飽騰之效其徐占彪所遺

靖遠防務甚關緊要臣已檄飭蜀軍統領黃鼎派營員張玉文統

帶移駐合併陳明上諭軍機大臣等新疆軍務朝廷本欲俟甘

省大定次第籌辦此時既有俄人代爲收復伊犁之事勢難置爲

緩圖惟關外事機緊迫劉銘傳須俟病痊再行拔隊前進尙恐緩

不濟急朝廷正深焦灼茲據左宗棠覆奏遵派提督徐占彪所部

十二營由靖遠取道蘭州前赴肅州實能力顧大局該軍旣堪當

一路之寄著卽飭令迅速前進不得因有劉銘傳屯紮肅州之旨

稍涉遷延一面咨催成祿先行部署一俟徐占彪到後卽令成祿拔隊出關並將啟程日期奏聞肅州防勦事宜卽責成徐占彪妥爲籌辦將來劉銘傳到肅後亦可商同布置成祿見在出關糧餉最關緊要該軍雖有專撥之餉深慮各省未能如期解到左宗棠亦當代爲籌畫隨時接濟俾利師行本年正月間據奎昌等奏稱綏來等處民團可用當諭左宗棠或派員出關或飭口外鎮道妥籌安撫該大臣究竟如何籌辦儻所派之員因道路梗阻未能西行卽可隨同徐占彪大隊赴肅並與成祿一同出關將該處民人加意撫綏務使各團樂爲我用以收指臂之效將此由六百里諭令知之○戊辰諭軍機大臣等杜嘎爾奏查明賊匪情形請將官軍擇地移紮並派員採辦兵丁衣服各摺片據稱甘肅回匪侵擾二年皆由土爾扈特旗突出往來搶奪見被官兵在烏喇特境全

行剿滅附近亦無另股惟潰匪尙多不知盤踞何處土爾扈特境
內有無另股賊匪亦未深悉等語該處逆匪雖經官軍剿盡惟潰
賊紛竄各處尤恐勾結本地匪徒蔓延爲害亟應迅圖撲滅著杜
嘎爾督飭各軍確加偵探將潰散餘匪分投剿捕迅速殲除毋畱
餘孽其土爾扈特境有無另股並著嚴飭派出官兵實力躡探務
得確情不得稍有含胡致貽後患該處陰雨連綿兵丁等衣服不
齊多染寒疾杜嘎爾已派員分赴張家口歸化城等處買補衣服
卽著定安慶春督飭各屬妥爲照料毋誤要需其吉林黑龍江各
隊卽照杜嘎爾所請准其暫紮四子部落等處以就水草將此由
六百里各諭令知之○諭文碩奏遵旨曉諭沙山子民人及聞俄
國收復伊犁一摺文碩接奉前旨派員赴沙山子曉諭該處民人
該民人等團練殺賊奮勇可嘉仍著奎昌瑛榮文碩隨時相機鼓

勵趙興體董率有方前已照請獎勵該軍功急功好義措辦倉糧二千餘斛深堪嘉尚並著奎昌等加之激勵以期聲勢聯絡俾爲我用俄人帶兵代爲收復伊犁前據總理各國事務衙門奏及已令榮全馳赴伊犁妥爲布置文碩見接土爾扈特親王車林拉布坦來文及委員探報均有俄人收復伊犁之事其是否將城池仍交中國接管尙難遽定榮全當懷遵前旨迅赴伊犁與之會晤商辦文碩見已鈔發俄國條款等件札交千總李昶以備接晤俄人與之應對榮全抵伊犁後該千總亦可得所稟承也車林拉布坦既有允爲俄人帶路往攻瑪納斯情事奎昌瑛榮文碩尤當設法開導加意籠絡毋稍大意伊犁之事烏科兩城曾否有人前來報信著金順奎昌多布沁札木楚瑛榮文碩仍遵七月十七日寄諭隨時確探具奏關外各團亟宜乘時激勵各該處民人流離困苦

亦須加意撫恤文碩以陝甘委員未到暫令千總李昶駐紮該局以通聲氣所辦甚是前諭左宗棠或派員出關或飭口外鎮道妥籌安撫昨復有旨詢問該大臣當飭令所派之員剋期前往將關外民團設法拊循迎機利導激其報效之忱於大局實有裨益另片奏俄人私移鄂博見籌辦理情形等語俄官包達拉拜私將杜爾伯特達巴罕原立鄂博那至博勒克地方著奎昌瑛榮文碩知照該國務於來年查界之前趕將私移鄂博那回原處以符成約將此由六百里各諭令知之○庚午加賞普濟堂功德林賑米八百石○辛未丁寶楨奏整頓山東水師事宜從之○壬申諭李鶴年添撥銀六萬兩備東河工需○鄭親王承志革爵以原任奉恩將軍嵩德繼子正紅旗滿洲副都統慶至襲封○癸酉諭軍機大臣等杜嘎爾奏探明賊股竄出派隊進剿一摺賊匪二百餘名由

金塔寺城竄出搶掠旋竄入諾彥山前蘇琿圖等處並據伯克瓦齊爾等探報亦大略相同杜嘎爾見已派兵一百五十名交參領棟魯布管帶前進總管達爾濟亦派隊前往科雅爾諾爾地方扼要紮營賊匪避兵而行在諾彥山一帶紛竄卽著飭令棟魯布達爾濟等探蹤截擊迅將此股竄匪悉數殲除毋令逃逸杜嘎爾仍當隨時分路偵探將各處賊匪搜捕淨盡務絕根株其染病官兵及堪用駝馬迅卽設法認真整頓以期追剿得力將此由五百里諭令知之○甲戌諭軍機大臣等馮子材康國器奏攻克越南賊巢並富川等處捕匪情形各摺片越南賊匪鄧建新周仲汶等盤踞香消等處經總兵劉玉成等攻克復將曾亞治餘黨王大臣等擒獲惟鄧周二逆率殘黨向太原一路逃竄首惡未除仍恐復出滋擾著馮子材康國器飭令劉玉成等跟蹤追剿迅速殲除其陳

四何三等匪竄入諒山太原交界之螳螂隴坵地方並著督飭官軍分投搜捕以絕根株逆首蘇輜漢遣黨赴廣東乞降業經瑞麟派委知府何世俊等前往查辦該匪是否真心反正瑞麟務當飭令何世俊等詳細察看不可輕率招撫致貽後患著馮子材等就近體察情形儻該逆意存反覆卽行派兵進剿毋誤事機竄擾富川之盜匪盤科仔等見已拏獲永甯附近之四十八嶠踞匪黎伯城等亦經參將黃新春帶兵剿除所有在事出力員弁准其擇尤保獎該處地勢險阻難保無餘匪潛藏仍著馮子材康國器飭令遊擊黃興仁等常川巡緝毋稍疏懈其藤縣永安接壤之滿村思排等處股匪著飭都司盧殿清等剋期攻剿以靖地方劉長佑已抵廣東接印該撫調任廣西此時諒可接奉諭旨著卽速赴新任將援剿越南及本省剿匪事宜會同馮子材妥商辦理越南軍務

尤當迅速辦完毋再遲延時日馮子材等另片奏進剿越南賊匪奪獲象隻擬挑選呈進等語著照所請准其挑選數隻派員解京並檄飭該委員等沿途安靜行走毋得騷擾將此由五百里諭知瑞麟劉長佑馮子材並傳諭康國器知之○丙子總理各國事務衙門奏日本國使臣議約事竣來京呈貢方物得旨該國所呈方物著畱中其另餽土儀一分卽著恭親王收受○丁丑 永陵草倉河工竣○諭禁四川私種罌粟○詔各省設局收養流寓孤寡○己卯諭軍機大臣等奎昌等奏遵旨籌辦伊犁情形暨棍楚克丹贊等回籍葬親請飭東兩盟照常換班各摺片榮全因接到俄國來文有約會派兵出征之語派令防禦多仁泰先赴伊犁查探情形多仁泰著照所請賞給三品頂帶並賞換花翎卽著飭令該員趕緊前往將一切情形詳細確查隨時稟明酌辦據實具奏俄

國旣代爲收復伊犁非有大員迅速前往經理恐該國更有所藉口著榮全懍遵前旨部署啟程需帶官兵或卽在烏城附近酌調以資迅捷其如何取道前進如何派兵駐守前由戶部撥銀二十萬兩並另籌賞需此外尙應籌餉若干餘由塔爾巴哈台行走外尙有何路可以徑達伊犁科城迤西五站以外臺站阻絕應如何鼓勵蒙民一體設立臺站俾官兵糧餉往來不至窒礙兵少不足以振威兵多又艱於糧運榮全應帶兵若干名均著與奎昌等通盤籌畫迅速奏聞榮全素性勇往朝廷固所深知奎昌等斷不可畏難遷延致誤大局棍噶札勒參之弟棍楚克丹贊等同洮州原籍葬親經奎昌等派令把總朱澍帶兵護送經由綏遠城行走著定安查明另給護照一面行知山西陝西甘肅各督撫轉飭各屬於棍楚克丹贊等經過地方一體驗照放行並令原籍洮州於事

竣後加給執照俾令仍回烏城定安並傳知棍楚克丹贊等沿途
安靜行走所過州縣毋得藉端騷擾前據張廷岳等奏東兩部落
防堵喫緊該協理將軍等未能赴烏當諭烏里雅蘇台將軍咨行
西兩部落就近直班茲據奎昌等奏本年秋夏季值班已令西兩
部落代替惟烏城軍務亦須喫重所有蒙古各務均恃副將軍轉
飭辦理未便專責西兩盟常年駐班致涉偏枯且遇有應飭東兩
盟事務呼應不靈等語所奏亦係實情著張廷岳阿爾達什達自
明年起仍照常例令東兩盟副將軍等赴烏換班如屆時遇有要
務該副將軍等未能前往卽著揀派公以上明幹札薩克前往署
辦印務將此由五百里各諭令知之○庚辰命蘇廷魁來京以喬
松年爲河東河道總督

由倉場侍郎遷

○辛巳諭軍機大臣等張廷岳等

奏偵探賊匪情形請飭催古北口練軍迅速前進並籌解馬匹軍

火接濟前敵各摺片賊匪分擾阿畢爾米特遊牧等處大股在珠格倫山一帶盤踞八月初二日復竄至沙巴克台地方分路滋擾張廷岳等見撥馬匹軍火解往伯克瓦齊爾軍營以資接應卽著督飭伯克瓦齊爾偵探賊蹤相機進剿並著杜嘎爾督率官軍會合夾擊務期悉數殄滅早靖邊疆塞外地方遼闊兵分數路防剿均屬不敷古北口練軍業已先後啟程暫紮宣化等處前據慶春奏擬將該軍分紮賽爾烏蘇迤北庫屬臺站當經諭令張廷岳等酌度辦理見在庫倫需兵孔亟著李鴻章催令都司賈吉齡迅速拔隊馳赴庫倫慶春將臺站駝隻籌備支應俾利遄行該運到庫後卽著張廷岳等體察情形妥爲調度如西路軍情緊急或由張廷岳督兵進剿或另派得力員弁帶隊前往會剿均著斟酌緩急機宜妥籌辦理將此由五百里各諭令知之○諭劉崐奏清查益

陽等處逸匪勒緝首逆並分布各軍情形一摺湖南益陽等處逸匪經李光燦等督飭官兵團練分路搜捕疊獲多名逆首劉道美之妻鍾氏何春台之弟何子詳亦均緝獲訊據供稱劉何兩逆於桃花江潰竄後日久無蹤劉崐見飭地方官購覓眼綫並派副將戴登高等帶同兵役分赴各處搜查卽著嚴飭派出各員密探賊蹤將劉道美何春台迅速拏獲毋任遠颺致稽顯戮其分布彈壓各軍並著飭令嚴扼要隘實力巡查不得稍有疏懈湖南伏莽甚多該撫務當將團練保甲各事宜認真整頓以清奸宄而消隱患將此由四百里諭令知之○調邵亨豫爲倉場侍郎以胡瑞瀾爲禮部右侍郎

由左副都御史遷

○壬午諭軍機大臣等劉嶽昭岑毓英奏

官軍進剿東溝獲勝並攻克小東溝賊巢一摺賊首馬城麟久踞河西縣屬之大東溝與小東溝匪首合輦治句結爲患經馬如龍

派兵分道進攻復親率隊伍繼進將小東溝賊巢收復並擒獲合
輜治等正法其餘賊眾就撫惟大東溝之賊尙負隅死守馬如龍
督隊勦賊身受槍傷曾否痊愈殊深廕繫卽著劉嶽昭岑毓英傳
知該提督迅速調治一面督率兵勇乘賊匪勢蹙之時趕將大東
溝逆巢攻拔毋令首逆馬城麟乘閒逃遁致稽顯戮此次出力及
陣亡員弁兵勇准其俟大東溝肅清後彙案奏請獎卹其小東溝
招撫人眾務當設法彈壓隨時稽察毋令再生事端將此由五百
里各諭令知之○以直隸辦賑免各關卡商販米釐並嚴禁鄰省
遏糧○乙酉予湖南殉難知縣吳熊建祠典史馬景恆附祀○丙
戌諭軍機大臣等奎昌等奏俄取伊犁遵旨籌辦情形請飭杜嘎
爾赴翁音河一帶勦賊定安奏另股賊匪復犯草地派隊迎勦薩
薩布因病請假張廷岳等奏請派兵擊賊並催古北口官兵暨購

備鐵掌各摺片俄人代復伊犁仍令滿漢察哈爾官員辦事亟須
大員前往經理著榮全仍遵疊次諭旨與奎昌多布沁札木楚會
商部署啟程榮全擬由杜嘎爾軍營抽調黑龍江頭起三起官兵
五百名交吉爾洪額統帶吉林官兵五百名交訥蘇肯統帶配齊
軍火器械並將奪獲賊中駝隻選擇膽壯者五百隻兼程前進限
九月內到烏並擬將在綏防剿之薩薩布所帶吉林黑龍江馬隊
一千二百餘名調至杜嘎爾營中以補其數見在杜嘎爾剿賊亦
屬喫緊之際該副都統能否令吉爾洪額訥蘇肯帶領馬隊赴伊
抑或另行派員統帶前往著榮全與杜嘎爾悉心商酌妥籌調派
聞索倫官兵見駐葦塘子地方榮全即可就近帶往以壯聲威杜
嘎爾無論如何爲難總須抽調官兵撥交榮全帶赴伊城不得因
榮全尙有索倫官兵可撥遽存推諉榮全擬帶官兵一千餘名裹

糧三箇月約需二十萬斤請飭由口北道歸綏道另籌款項各先辦糧十萬斤由臺站解赴烏城卽著李鴻章何璟飭令各該道如數籌辦由綏遠城張家口分道運解並著定安慶春趕緊催提設法趨運以濟要需所請添調吉林黑龍江馬隊二千名之處該處官兵年來徵調不少已諭該將軍等先行挑齊候旨備調奎昌等所稱迤西約十數站應設糧臺之處著瑛棨文碩與奎昌等妥籌辦理定安所奏賊匪竄入阿畢爾米特旗遊牧諾彥山等處與奎昌張廷岳等奏報大略相同該將軍已令侍衛永德督帶馬隊由濟斯洪果爾馳赴烏喇特旗會合杜嘎爾所派之兵進剿此項官兵本應由薩薩布統帶西進見在杜嘎爾所部馬隊旣須撥赴伊犁薩薩布一軍尤當速赴杜嘎爾營中合隊以資厚集薩薩布病尙未愈著定安飭令迅速調理就痊剋日啟程一面檄令永德先

行帶隊進發探蹤截勦杜嘎爾前奏賊匪並不甚多而本日奎昌等奏賊中逃出蒙古人供稱賊約二萬分起向西撲犯於七月二十七日已到巴彥察罕山逼近翁音河又據張廷岳等奏賊於八月初開竄至巴勒達爾多濟爾旗界內向東北竄擾賊眾約六七千人欲犯庫倫賊蹤已至翁吉河哲林等處各等語賊數究有若干見在究竄何處共有幾股著杜嘎爾偵探明確賊勢趨重何路卽行迎頭攔擊並著奎昌等督飭派出蒙古官兵速赴哈爾尼敦等處與達爾濟一軍合力堵擊張廷岳等亦當飭令伯克瓦齊爾統率所部實力嚴防以遏奔突庫倫軍情喫緊著李鴻章迅催都司賈吉齡統帶古北口練軍星速前進並著慶春嚴飭各臺妥速應付駝隻俾得早日到防張廷岳等奏口外駝馬疲乏皆由不用鐵掌所致著定安慶春於綏遠城張家口兩處將鐵掌寬爲籌備

一面咨照各該統兵大員需用若干隨時領取以利馳逐奎昌等
另片奏請調員隨營已諭侍衛處令錫綸馳赴烏城並諭戶部等
衙門揀派司員筆帖式六員一併前往其山西試用縣丞長賡試
用從九品曹遇亨著何璟飭令由驛赴烏交榮全差委所請揀發
大員二員俟簡派有人再行發往將此由六百里各諭令知之○
以捐備軍需駝馬晉烏里雅蘇台參贊大臣札薩克圖汗郡王銜
貝勒多布沁札木楚爲郡王○是月豁免山東濮州被水節年課
稅

九月己丑諭軍機大臣等慶春奏賊匪竄近臺路派撥馬隊保護
科城糧餉並飭官文迎剿催古北口練軍出口杜嘎爾奏探明西
境竄匪向東擾犯添隊堵剿各摺片科布多一起餉銀運至窄爾
瑪克臺因察布察爾臺迤西探有賊匪蹤迹經該解員弁將餉銀

折回哈沙圖地方不敢遽行前進慶春見飭達爾濟派撥馬隊就近前往保護科城軍餉一面選派勁旅迎頭截剿並飭參領車德恩撥兵馳赴賽爾烏蘇護餉衛臺卽著該署都統嚴飭達爾濟等確探賊蹤認真防剿不得稍有疏虞臺站人眾聞警易致驚惶務當責令玉和等妥爲拊循毋令疑懼逃避又蹈從前覆轍賊匪奔竄靡定見又撲犯翁音河圖犯庫倫若不趕緊殄除轉瞬風雪嚴寒勦辦更形棘手都司賈吉齡所帶古北口一軍已定於九月初三日由宣化啟行赴口著李鴻章嚴催該都司迅速拔隊前進馳赴庫倫慶春將該將軍應需駝隻帳房等項設法寬爲籌備以利師行杜嘎爾見已追賊至烏蘭察布盟界距翁音河二千餘里雖據該副都統派兵四百名交富珠哩等偵探夾擊惟相隔較遠奎昌多布沁札木楚張廷岳阿爾塔什達總當就見有兵力相機扼

勦毋令蔓延杜嘎爾亦當偵明賊蹤督兵會合夾擊盡殄賊氛定
安前已派侍衛永德馳赴烏喇特旗一帶探勦此次慶春請飭綏
遠城將軍派隊馳往察布察爾一帶勦賊之處著定安斟酌調度
軍情妥籌辦理其多倫諾爾等處防務卽由慶春隨時知照庫克
吉泰嚴密巡防毋令東竄將此由六百里各諭令知之○辛卯諭
軍機大臣等左宗棠穆圖善奏官軍分路勦賊獲勝成祿奏肅回
紛擾關內外地方請飭撥兵會勦並撥給餉銀各摺片回匪紛擾
西路之古浪縣境及東路之李家莊等處疊經馬步官軍擊退其
鎮番等處竄匪亦經防軍截勦獲勝見在大軍進規河州誠恐該
逆四出滋擾以圖牽掣穆圖善已赴安定與左宗棠會晤該大臣
等務當悉心妥商一面進擣賊巢一面嚴防竄路並將省垣防務
妥籌布置以固根本肅州回逆勾結外來回匪攻陷屯莊紛擾關

內外地方勢甚猖獗若不速籌掃蕩恐地方日被蹂躪出關大路必致梗阻左宗棠前奏已派徐占彪一軍前赴肅州著卽飭令趕緊拔隊前進將肅州一帶賊匪實力剿辦該軍既經西行所需餉銀著左宗棠源源接濟以勵軍心成祿見應出關著卽部署一切俟徐占彪抵肅後該提督卽行統率所部剋日起程此次規復新疆各城關繫極重務當振刷精神竭力籌辦不得遷延貽誤穆圖善另片奏所部各營歷年防剿出力懇請保獎等語著照所請准其酌保數十人其防守鎮番出力官紳等著一併擇尤保奏成祿另片奏金塔地方擊退賊匪情形所有在事出力員弁團紳著准其擇尤酌保毋許冒濫又片奏護理安肅道寶型辦事乖僻不能得力著卽行撤任並著左宗棠迅飭蔣凝學前赴本任以重職守如蔣凝學一時不能前往卽著另委委員署理劉銘傳前經賞假

東華錄
一月調理並諭令督率所部前赴肅州屯紮刻下肅州軍務喫重
著該提督趕緊督隊啟行早日到防該處爲出關要道得該軍扼
紮其閒庶可紓朝廷西顧之憂也將此由六百里各諭令知之○
諭成祿奏武弁棄營逃走請飭查拏等語本年四月十八日回逆
襲破布隆吉營署都司張大倫帶印逃走五月初一日復襲破橋
灣營官祁姓都司謝姓戰敗脫逃均不知下落亟應從嚴懲辦著
左宗棠文麟景廉飭屬將張大倫及祁姓謝姓一體查拏務獲從
重治罪以肅軍律前因俄人代復伊犁並有往攻烏魯木齊之說
諭令景廉酌帶兵勇規復烏城見在如何部署即著悉心籌辦迅
速具奏肅州回匪見竄玉門等處著文麟酌撥官軍相機截剿毋
令蔓延將此由六百里各諭令知之○提督馬德昭軍潰擾潼關
旋剿平之德昭下部嚴議○予甘肅陣亡參將萬應全祭葬世職

○癸巳諭軍機大臣等據馮子材奏廣西署太平府知府兼理龍州同知徐延旭將回籍降人驅逐出關致受撫之周仲汶等仍附蘇帽漢等復在越南滋擾且縱勇通賊搶掠夷人財物虛開勇額冒領餉精該員於所屬境內私設釐卡船埠每年所獲不下萬金其幕友包攬土官販買人畜分肥徐延旭亦明知故縱並有濫保官親家丁等情事據實嚴參請革拏治罪等語徐延旭由縣令起家疊膺保獎前據蘇鳳文密保該員才兼文武器識宏深若如馮子材所奏是該員貪劣不職蘇鳳文薦舉非人且於該員官親丁役捏功濫保未能覺察爲所蒙蔽亦應查明懲處著劉長佑按照所參各節確切查明據實具奏毋稍徇隱原摺片均著鈔給閱看所呈私釐照票三十五張著一併發給閱看將此由五百里諭令知之○撥部庫銀十萬兩備永定河工需○甲午諭軍機大臣等

前因有人奏已革提督李世忠在皖豫交界葉家集修築堡寨私藏礮械招集亡命請令李鶴年英翰查奏嗣據英翰奏稱該革員回籍後已移居商城縣境之鎖口未聞別滋事端等語李世忠移居商城後見在能否安靜著李鶴年英翰嚴密訪查據實奏聞馬德昭所部勇丁滋事步行逃勇業經截殺殆盡其搶有馬匹向東散逃曾據蔣志章奏稱逃往閩鄉盧氏等境此項潰勇見竄何處李鶴年務當督飭派出官兵會同地方官悉數搜捕毋令再滋事端將此各諭令知之○諭張廷岳等奏庫防情形危急請飭催援軍並賊匪逼近庫倫各摺片逆匪於八月十四十七等日竄至翁吉河哲林等處擾哲林臺迤東之圖爾里察布齊爾臺站賽爾烏蘇西北臺路已斷另股逆匪於二十至二十二等日分竄圖謝圖汗部落烏克爾哈什雅圖地方距庫倫不過七八臺有直撲庫倫

之信情形甚爲危急達爾濟一軍已馳抵烏勒幹呼秀地方著張廷岳等就近檄令會合齊莫特多爾濟伯克瓦齊爾等迎頭截擊力遏狂氛古北口練軍疊經催令出口見在庫倫待援甚急著李鴻章嚴飭買吉齡統帶遄行慶春一面迎提到口卽將駝馬等項妥爲應付催令剋日進發馳抵庫倫毋任延緩杜嘎爾帶兵剿賊是其專責數月以來未見大挫逆鋒且前據奏報賊數無多而於大股分竄之賊並不探明確實設法截剿實屬不知緩急見在賊蹤竄近庫倫情形萬緊該副都統豈得徘徊於無賊之地任令賊勢披猖著卽督帶各隊兼程前進將翁吉河一帶賊匪實力剿辦迅掃逆氛定安前飭侍衛永德統率馬隊由濟斯洪果爾馳赴烏喇特旗著懷遵前旨卽飭此起官軍迅速取道前赴杜嘎爾營中合隊以資進剿並著催令薩薩布趕緊前往督帶不得藉病延宕

將此由六百里各諭令知之○命英桂畱京以張之萬爲閩浙總

督調何璟爲江蘇巡撫以鮑源深爲山西巡撫

由戶部右侍郎遷

○乙未

調溫葆深爲戶部右侍郎黃倬爲禮部左侍郎

由戶部右侍郎遷

○乙未

侍郎以徐桐爲禮部右侍郎

由內閣學士遷

○察布察

兩各臺兵潰諭慶

春等設法招集並撥隊馳防○丙申諭軍機大臣等蘇廷魁奏黃

水入湖竄運情形喫重等語黃水由王家橋地方竄入牛頭河將

芒生牯月壩衝開南旺湖西北兩岸旱石橋趙家口等處均漫水

入湖土地廟元帝廟二牯衝開倒流入運西岸天仙廟等處亦均

漫水入運東岸情形喫緊趙王河水又灌入牛頭河北岸村莊悉

被淹沒見在南旺湖水已深至七尺餘倒漾入運清濁併流已成

大患亟應力籌堵禦著蘇廷魁嚴飭運河道督飭該廳營文武各

員趕緊集夫搶護西隄毋再疏失東隄爲蜀湖屏蔽關繫緊要並

著勸諭居民協力防守不可稍涉鬆懈其被水各村莊丁竇積務當遴派妥員前往查勘分別被災輕重妥爲撫恤毋令一夫失所該撫身任地方其應行協同修築疏濬之處並著督飭各該地方官實力籌辦以維河運全局將此各諭令知之○詔撥倉米三萬石部庫銀四萬兩賑順天被水災民○丁酉左宗棠奏竊蘭州車行驛道東由會甯靜甯隆德出平涼以達陝西馱行間道東南由秦州以達陝西而安定綰輟兩路居其衝要頻年回氛蹂躪受害最酷東道因之不通臣宗棠於七月二十九日由靜甯率輕騎取道會甯八月初二日抵安定接見統領後路全軍提督徐文秀統領左路全軍提督劉明燈詢商一切知鹽固甯靈一帶敗殘回逆及鞏郡土著各回皆寄眷屬於河州各賊巢分起四出剽掠每數十騎爲一起避兵而行颺疾如風伺便行動不但商旅文報常

有梗阻之虞卽餉糧軍火亦時防疏失自渭源狄道克復後河州諸賊出巢剽掠必由洮河西岸三甲集渡東岸康家巖然後分竄金縣安定會甯或東趨鹽固或北擾靜遠是安定爲賊迹出沒之衝途而康家巖又賊蹤必由之津要比卽定議徐文秀一軍由安定西北峴口出金縣秤鉤驛以達站灘劉明燈一軍由安定東南馬家河韓家坪出關門口內官營抵站灘與徐文秀合隊以攻康家巖初四日各營先發初六日徐文秀劉明燈由安定拔營繼進令每進一處各派隊分支包埽而前驅賊併歸康家巖然後聚而殲之初七日徐文秀途遇竄遁之賊數起揮軍縱擊斃賊數十名擒賊目馬得雲等二十四日總兵陳海俊副將陳締高同時埽花峴子伏賊斬賊數十擒賊目武邦賢等十五名均訊明正法初八日由好麥川楊婆廟一帶跟追而前登嶺瞭視羣賊馬步約二千

餘正紛紛竄走徐文秀揮所部各營分途截擊斃賊百餘名至沙
合嶺大雨收隊是夜雪霰交飛初九日冒雪馳抵黃石坪去灘站
四十里人馬疲困不能前進詢悉由黃石坪徑抵康家巖路較捷
遂改道不赴站灘之約初十日踰馬寒山至下營子則距康家巖
僅三十里矣其劉明燈一軍初四日由馬河一帶向西北折而南
趨沿途略有斬獲是日抵柳林溝十一日寅刻劉明燈令總兵黃
宏藻劉正高參將楊正茂各帶所部由三十里鋪新田鋪沿洮河
東岸前進飭參將殷德益都司鍾鳴鳳參將羅瑞秋副將鄧得勝
由大營坪斜鈔而前徐文秀率總兵鄭守南參將劉仁和由魏家
河出賀家溝總兵沈玉遂率陳締高陳汝俊由大營坪出東溝合
攻康家巖是日已刻行距康家巖數里徑薄賊卡堡賊千餘見官
軍逼近出卡抗拒徐文秀列隊迎擊而陳締高等已由東溝鈔出

賊後矣康家老巖堡中復出步賊數百來援洮西騎賊二百餘亦渡河助勢徐文秀令鄭守南陳汝俊陳締高劉仁和等分支兜擊陣斬悍賊二百餘名步賊縮退入卡馬賊見勢不支急上船西渡正爭渡聞官軍薄之溺斃無數卡賊憑牆放槍死拒弁丁傷者數人軍士愈憤周麾而登立破其卡斃賊約三百人生擒賊目哈章布等五名餘賊退入大堡劉明燈一軍是日甫出柳林浦口卽遇馬步賊數百揮隊擊之斬賊數十名賊敗入新田鋪合守卡賊併力穩抗適殷德益鍾鳴鳳羅瑞秋鄧得勝等從大營坪橫截而出賊敗狂奔各營奮威衝殺陣斬百餘名賊退入康家新巖及孫家堡劉明燈率馬步各營躡蹤壓迫立將兩堡攻破斃賊二百餘名生擒十一名餘賊叫號亂竄各堡賊亦相率潰奔併入康家大堡其渡洮西竄者均偪入急湍中溺斃無數徐文秀劉明燈兩軍旣

台卽下令布圍康家大堡及各小堡分撥甫定大堡內賊穴牆衝出各堡賊亦皆棄堡向洮河亂竄官軍分途追逐沈玉遂王前程橫出截殺斃賊最多計是役破大小莊堡十餘處陣斬溺斃之賊約二千數百名徐文秀劉明燈卽分據康家新巖孫家堡康家大堡立營訊據生擒賊供賊首馬爾和哈然麻已斃於陣矣十三日派隊搜山至距康家巖二十里沙碾子地方復斃賊百餘名溺斃無數竊維康家巖在洮河之東距省城百數十里距狄道州五十里對岸十里卽三甲集雖屬狄道轄境而實河州門戶由三甲集而西卽太子寺大東鄉等處均逆回麇聚之所洮河西岸山高徑險賊勢亦較中左兩路爲重必過河立營然後可戰必架造浮橋然後可渡見值秋霖疊降霜雪交加之時萬壑爭流岸闊溜急狄道架橋船隻纜索均已製造齊全康家巖則尙須併力經營乃

可集事一俟水退橋成卽當渡洮進剿臣穆圖善十六日來安定與臣宗棠籌商機宜意見相同旋即回省布置又奏西征協餉奉撥之數本不敷用而各省關除江西閩海關外均解不足數以故積欠累累至今已一千三百萬兩辦理西征糧臺侍講學士袁保恆目覩艱窘情形函咨並達穎禿屑焦不得已請旨嚴催蒙聖明洞鑒諭飭各省關新舊並籌各省不但新餉無增卽舊餉亦多延不照解臣軍所收協餉祇有此數而穆圖善豫師及甘肅舊有各軍營餉需均須由臣軍墊給且閒有奉旨飭西征糧臺墊撥之款臣軍餉事來源日減銷路日增而兵事則局勢愈寬待用愈急以故向章每年各營發三箇月滿餉上年僅發兩箇月今歲則端午中秋均未能發卽年節一關尙未卜何如矣此本軍士應得之餉銀然有則速發無則緩發諸將士諒臣有素或無異詞惟糧食

鹽菜衣袴巾履醫藥則生人日用所需沃難短缺非時其緩急源
源支給慈父且不能保其子將帥安能用其士卒哉且陝甘頻年
兵燹子遺僅存往往數百數十里人煙斷絕新復之地非俵給牛
種賑糧則垂斃之民勢將盡填溝壑各省克復一郡縣收一處丁
糧釐稅甘肅克復一郡縣卽發一處牛種賑糧非是則有土無民
朝廷亦安用此疆土也如城池宜修地方宜設官採糧轉運軍裝
宜設局已撫回民宜給賑所有薪俸經費賑務師行一處卽增一
處之需而皆仰給於臣不敢列款上請不得不於軍餉挹注早
爲補救此皆陝甘兩省官吏士民所共知者金積底定進規河湟
甘肅局勢雖有轉機而臣憂慮方深正以協餉不時至臣軍出款
日增入款漸減必將有不能敷衍點綴之勢耳不得已飭上海採
運局向華商籌借銀六十萬兩約以各省協餉到上海時分期扣

還復刊行印票搭發各處糧價訂期四十日六十日持票取銀聊資周轉如踰期無銀應付失信商民則並此亦不能行矣撫臣蔣志章稔知窘情於無可籌畫時慨允飭司庫借提銀十三萬兩候餉到歸款暫雖藉此敷衍然上海借款僅資應付印票轉運費用及撥還陝西庫款臣軍餉事仍是茫然恐大局決裂終所不免伏查各省奉撥之款皆部臣總覈各省出入數目酌量指撥原非強以所難疆臣心存體國誼在奉公如果易地以觀則協餉似亦不惟自急合無仰懇 皇上天恩申諭各督撫關差仍遵前旨按照欠數力籌新舊並解以濟急需而措危局不勝迫切待命之至至各省協款欠數若干西征糧臺開單具報在案部臣無難按籍而稽內如安徽一省經前署撫臣吳坤修籌定指撥有著之款吳坤修卸任後即停止不解而所派西征金運昌一軍由臣籌墊餉銀

十一萬兩贖催解還概置不答揆之情理似有未合河南一省月協甘餉二萬五千兩數年之久僅解過兩次積欠至一百四十萬兩有奇上年冬間欽奉諭旨提解積欠十萬兩該省僅解過二萬兩而下欠八萬兩竟不復解撫臣有無畛域之見臣不敢知藩司劉齊銜曾任陝西道員襄理軍需局務於甘肅窘迫實在情形不得諉爲不知而職守一分即便悍然不顧亦實非大局所宜此尤臣不能無言者也 上諭軍機大臣等左宗棠由靜甯會甯馳抵安定察看地勢賊情知安定爲賊蹤出沒之衝途而康家巖又賊蹤必由之津要督飭徐文秀劉明燈各軍分路進剿疊有擒斬乘勝合圍將康家巖莊堡全行攻拔殲斃賊匪二千數百名陣斃賊首馬爾和哈然麻官軍卽分據康家新巖等處立營以扼衝要見值秋深水退之時左宗棠務當飭令前敵各營迅架浮橋渡過洮

何節節攻剿迅奏膚功穆圖善與左宗棠籌商一切意見相同見已由安定旋省卽著將省城防守事宜妥爲布置左宗棠請催各省協餉一摺已諭令各該督撫迅速籌解矣將此由六百里各諭令知之○諭文碩奏遵旨詳查程途道里及籌辦大概情形一摺文碩見在詢悉西路情形實有俄官帶兵三千收復伊犁之信瑪納斯昌吉縣皆有賊匪盤踞民勇時往攻擊文碩已檄令委員李旭等查明綏來昌吉迪化各州縣境內實在賊情有無俄人前赴該處著俟該委員等呈報後隨時知照榮全妥爲籌辦毋失機宜由科布多前往伊犁及塔爾巴哈台路徑文碩旣已查明是榮全馳赴伊犁旣屬有路可通卽當剋期啟程不得藉詞延宕將來轉運軍餉能否取道西湖著文碩悉心酌度設法妥辦其庫爾喀喇烏蘇迪西如何設站安臺接護轉運著榮全奎昌多布沁札木楚

體察情形奏明辦理撥兵運糧各事宜最關緊要並著會商文碩
妥議具奏另片奏新到俄官尼克勒幅稱係帶兵駐紮備賊並非
查界之人等語中國徵兵欲往俄國爭界究竟謠傳何自而起俄
人聲言調兵備邊或係因此流言心懷疑惑著文碩檄令委員明
魁等查看情形設法解釋其請調遊擊施紹恆差委一節已諭何
璟飭令該員馳驛赴科交文碩差委矣文碩當將該城防務妥籌
布置以期有備無患將此由五百里各諭令知之○諭恩麟德泰
奏勦辦西藏逆番見已蕝事一摺逆首班墊頓柱等糾合噶勒丹
寺喇嘛僧眾恃險抗拒經恩麟等調兵進勦並會商達賴喇嘛催
令漢番文武勦撫兼施生擒喇嘛阿丹及已革噶布倫策忍汪曲
等二十五名並將班墊頓柱槍斃既據恩麟等奏稱質訊各犯情
詞相符所有阿丹策忍桑結及見獲從逆各犯均著照所擬分別

辦理至札克巴協捻策忍汪曲二犯並著恩麟等照例治罪在逃從逆人犯恩麟等當咨會達賴喇嘛務徹底請查究辦毋任漏網投誠之喇嘛僧眾仍責成各該寺領袖喇嘛妥爲管束不准再滋事端此次在事出力漢番文武僧俗官兵並傷亡兵練著恩麟等查明分別奏請獎卹將此由五百里各諭令知之○諭曾璧光奏籌辦苗疆大概情形一摺黔省清平等處尙未規復丹江凱里賊屯林立金幹幹等各酋亦尙未殲除見在下游防剿各軍不足三萬曾璧光所稱援黔一軍分半回楚兵分力薄進不能戰退不能守亦係實在情形楚黔唇齒相依而黔省下游軍務亦正在得手所有此軍應如何布置始臻妥協之處著劉崐等通籌全局會商辦理不得顧此失彼稍分畛域李包各逆見竄入寶山復合古州等處賊眾蠭聚三腳鄧有德已撥營赴援卽著曾璧光檄飭該提

督迅速前進併力兜剿至廣西能否撥兵協助仍著該撫隨時與劉長佑馮子材籌商以期聯絡夾擊迅速掃賊氛將此由六百里諭知劉崢曾璧光並傳諭周達武知之○左宗棠奏徐占彪馬步十二營遵旨前赴肅州臣於前月二十七日拜摺後卽飭駐陝軍需局籌備兩月餉需以資裹帶復飭甘肅軍需局酌將甘涼兩府屬運省糧石分別割畱以便支領一面飭徐占彪來營將欽奉寄諭宣示並詢商一切徐占彪尙能體會毅然請行於本月二十四日率所部馬步九營移駐蘭州金家巖候餉據駐陝軍需局稟已與陝西軍需局湊解銀四萬三千兩俟在途協餉續到立卽補解大約九月初旬徐占彪一軍可由蘭州啟行矣其畱靖遠之提督黃虎臣三營俟道員張玉文接防卽由靖遠徑赴蘭州會隊前進欽奉八月初八日諭旨已恭錄行知徐占彪矣至奎昌等奏稱綏來

民國可用前奉諭旨後已飭口外鎮道妥籌安撫迄今尚未接其稟覆近接各軍稟報肅州撫回復叛成祿力不能制紛請派援成祿函報亦同之徐占彪兵到肅州卽有戰事委員暫難出關也報聞○子貴州陣亡參將周文和等祭葬世職○己亥諭軍機大臣等左宗棠穆圖善奏截剿竄匪獲勝一摺本年八月間副都統雙福等在平城堡大澇池等處截擊竄匪均有斬擒涼州鎮總兵王仁和帶隊至永昌等縣地方節節搜剿疊獲勝仗著左宗棠穆圖善仍飭該將領等實力防剿遇賊卽擊毋稍疏懈穆圖善另片奏見由安定回省並陳會商布置情形等語康家巖攻克後官軍擬進偏三甲集而中隔洮河難以徒涉見飭各營塔造浮橋安定迤西之車道嶺地方經穆圖善派隊前往修墊車道以通糧路著飭令將橋道各工迅速辦竣俾得剋日進取穆圖善擬抽撥數營赴

康家巖填紫騰出左宗棠所部得以壹意前進卽著左宗棠穆圖
善悉心會商妥籌布置左宗棠務當督飭官軍節節進剿以期挫
渠埽穴早靖邊陲將此由五百里各諭令知之○庚子諭軍機大
臣等豫師奏籌防甘涼肅一帶情形等語豫師接奉前旨籌防要
隘所稱自平番至威遠各隘口分投防堵賊匪不能由此出竄是
已確有把握卽著責成豫師妥爲布置不得徒託空言至由巴燕
戎格山後可達西甯之大通出扁渡口卽係永昌山丹鎮番地界
賊如繞竄北路則甘涼轄境均被騷擾亟應加意嚴防豫師已知
照王仁和楊占鼐等力扼要隘以備不虞仍著會商瑞雲隨時防
範務臻周密不可稍有疏懈肅州收撫陝回潰叛東下甘涼戒嚴
西甯匪徒亦四出竄擾西路幾成賊藪豫師未可以屢挫賊鋒稍
存大意尤當相機戒備以衛地方左宗棠仍當懷遠前旨撥兵助

勦並著穆圖善妥籌兼顧將此由五百里各諭令知之○辛丑諭
軍機大臣等張曜奏遵辦甯夏沿邊及阿拉善旗防勦情形一摺
阿拉善旗西界紅柳園等處地方時有馬賊竄入搶奪牲畜另股
賊騎復突竄胡莫克巴音諾爾根等處肆擾雖經官軍迎勦擒斬
多名惟該旗地方遼闊平坦無險深恐防範難周張曜已添派李
葆珠帶隊前往卽著飭令該提督將竄入該旗匪股迅速勦捕淨
盡毋任滋蔓至甯夏河西三縣投誠回眾與漢民雜處尤慮藉端
尋釁復滋事端張曜業經酌擬章程咨商左宗棠督飭地方官嚴
辦所有撫綏彈壓各事宜仍著該提督隨時相機辦理毋稍大意
左宗棠見在進剿河州難保該逆不伺竄北路並著該提督先事
豫防隨時與定安籌商布置以期周密自甯夏沿邊迤北一帶道
路綿長如平羅中衛靖遠平番古浪鎮番之大靖土門金塔等處

匪徒處處可以出邊滋擾亟應設法嚴防著該提督遴派明幹員弁將甯夏至肅州沿邊一帶口隘由近而遠確切查明何處賊匪可以出竄何處可以扼要設防繪圖貼說詳細奏聞○壬寅諭軍機大臣等奎昌等奏達爾濟擊賊獲勝張廷岳等奏伯克瓦齊爾擊敗竄匪並圍攻賊股情形各摺片此次賊匪由翁吉河一帶分股肆擾經達爾濟一軍於喀喇地方迎擊獲勝大股之賊直犯庫倫復經伯克瓦齊爾繞出賊前至阿達哈楚克山額里音華地方截擊一日之內連獲三捷剿辦甚爲奮勉見在畢雷圖廟內盤踞之賊尙有七八百名亟應乘其窮蹙悉力圍攻聚而殲旃斷不可再令竄出致貽後患張廷岳見已添派官兵助剿並親往察看布置著卽督飭官軍穩慎圖功毋稍疏失庫倫防務仍著張廷岳阿爾塔什達妥爲籌辦不得稍涉大意此外賊匪尙有幾股見竄何

處達爾濟見暫紮翁吉河著奎昌等飭令探明賊蹤認真截剿並著張廷岳等隨時知照該總管互相聯絡以資策應杜嘎爾見在行抵何處著卽懷遵疊次諭旨馳赴翁吉河一帶相機剿辦迅殄逆氛不得遷延觀望任賊滋蔓薩薩布所部馬隊仍著定安催令星速前進以資厚集將此由六百里各諭令知之○申諭都興阿等整頓奉天捕務○癸卯諭軍機大臣等劉銘傳奏病難速痊懇恩賞假回籍調理並請派員接統淮軍各摺片劉銘傳著賞假三箇月回籍調理至請飭曹克忠來陝統帶馬步各隊本日已諭令李鴻章傳知該提督卽行前往矣甘肅軍情緊要曹克忠未經到陝以前劉銘傳仍當妥籌布置不得以接統有人遽行該卽俟曹克忠到陝該提督再行回籍調理以重防務將此由四百里諭令知之○予江西陣亡知府陳宗元建祠○甲辰諭軍機大臣等都

察院奏廣西職員譚成典遣抱告譚保桂以匪徒肆擾籲懇勦辦等詞赴該衙門呈訴據稱永安藤縣交界之滿村地方有匪首何先體及何中孚何七一等聚黨滋擾七年四月攻奪蜈蚣村經官兵往勦該逆竄回老巢外委庾應榮受賄通賊逆倭復張連攻村堡肆行殺掠等語此案前據馮子材康國器奏滿村等處股匪已飭都司盧殿清等帶兵前往勦辦當經諭令該提督等飭盧殿清等剋期攻勦茲覽所控各情匪徒擾害閭閻亟應迅籌勦滅以靖地方著劉長佑馮子材速飭派出各軍實力勦捕務將此股匪徒剋日殄除毋稍稽延致令養癰成患並著查明外委庾應榮有無通賊情事從嚴懲辦以儆官邪將此由五百里各諭令知之○諭張廷岳奏帶兵大員貽誤戎機請旨查辦並帶兵回庫各摺片畢畱圖廟內盤踞之賊不過八九百名自應悉力圍攻一鼓殄滅乃

總管達爾濟輕聽賊匪投誠之言自懈防守並阻止伯克瓦齊爾等軍無須巡邏致令賊匪於九月十三日乘夜向西奔逸貽誤戎機實堪痛恨札薩克齊莫特多爾濟伯克瓦齊爾業經張廷岳摘去頂帶以示懲儆達爾濟輕妄縱賊厥咎尤重著先行摘去頂帶交奎昌榮全多布沁札木楚杜嘎爾查明達爾濟節次貽誤情形從嚴參辦以肅軍律並著將被裹從逆之邢章解赴烏里雅蘇台交奎昌等嚴訊賊匪竄逸情形據實具奏見在賊匪竄向何處張廷岳當飭伯克瓦齊爾等探蹤跟追痛加剿洗杜嘎爾亦當督飭各軍確探賊蹤會合夾擊並著嚴飭達爾濟實力兜剿毋令得容喘息餘燼復燃張廷岳恐賊分股直犯庫倫見已帶兵回庫即著將防守事宜妥籌辦理毋稍疏忽賊股竄向靡定著定安嚴飭各路防軍遇賊即擊毋形疏懈其薩薩布所部馬隊仍著催令星速

前進以資厚集將此由五百里各諭令知之○諭劉嶽昭岑毓英奏通籌全局分路進剿一摺滇省東南一帶未拔賊巢均距省城甚近自應先行剿除以去肘腋之患大東溝尙未克復馬如龍受傷未痊深慮館驛賊匪出援致成滋蔓婆兮田心及日者鄉進剿之師亦未得手岑毓英見已帶兵啟程親赴迤南督剿可謂勇於任事卽著激勵各營分投掃蕩迅拔各巢肅清東南一路臨安府屬既有賊巢數處梁士美僅派隊駐紮通海曲江一帶安坐府城並不遵檄剿賊漸形跋扈岑毓英當設法駕馭隨時約束毋任如前驕恣省城巡防事宜暨接濟各路餉需軍火著劉嶽昭悉心籌畫不得稍有貽誤另片奏攻克永昌府城等語永昌見既攻克該處及防守事宜該督撫卽飭在事各員妥爲布置乘勝進攻永平將未復各城次第收復爲直擣大理之計岑毓英見赴迤南所有

迤西軍務仍著妥籌兼顧將此由六百里各諭令知之○諭總理各國事務衙門奏奧斯馬加國換約屆期請派員互換一摺奧斯馬加國前立條約聲明一年更換見據該國使臣嘉理治呈遞照會內稱卽日赴滬候辦換約等語著派恩錫將同治八年與奧國所立條約妥爲互換其條約各本俟李鴻章派員齎送至江蘇時卽著恩錫祇領屆期前往上海辦理恩錫於換約一事向未經手著曾國藩添派熟悉洋務大員幫同辦理以期妥協本日諭旨一道一併發往如該使索看憑據卽著恩錫另行恭錄給予閱看俟換約事畢此旨仍繳還軍機處備查將此由五百里諭知曾國藩並傳諭恩錫知之○乙巳諭軍機大臣等李鴻章奏練軍分起出口日期請飭察哈爾臺站防護弁兵互相援應並由庫倫多派駝隻迎引一摺古北口頭起官兵已於本月初六日出口其餘各哨

每起百名聞日前進賈吉齡亦親率中營於十二日赴口陸續進發卽著李鴻章飭令該都司督率各起官兵迅速趨程接續前進毋稍遲誤李鴻章摺內見有探聞馬賊三四千餘由山後烏拉齊向東北分股竄擾圖謝圖汗地面距賽爾烏蘇較近等情該軍前赴庫倫必由賽爾蘇經過深恐附近有賊突至或致疏失著慶春檄飭沿臺防護弁兵於該軍經過時互相援應並著張廷岳阿爾塔什達多派騰壯駝隻遴委得力員弁帶赴二三十臺處所沿站迎提導引以免遲滯此軍到庫後應如何分撥防剿張廷岳等務當妥爲布置力保要區將此由五百里各諭令知之○丙午諭軍機大臣等神機營王大臣奏請整飭邊外臺站一摺前因庫倫情形喫緊察布察爾等臺官兵潰散深慮官兵停滯中途糧餉軍火多致梗阻屢諭慶春趕緊設復又以榮全馳赴伊犁於庫爾喀喇

烏蘇地西如何設站安臺接護轉運諭令榮全等體察辦理茲據該王大臣奏稱邊外各路臺站見擬分段責成張家口外頭臺至八臺專交察哈爾都統自九臺以北至烏里雅蘇台科布多各臺分交各該盟長自賽爾烏蘇至庫倫自濟斯洪果爾至歸化城各臺亦交各該盟長按照定制何臺應歸何旗管轄者仍令該王公等自行經理每臺連額設之數以藥駝一百隻馬十匹爲定數戈壁地內不能用馬之處卽備藥駝一百五十隻如不敷用應由幫臺辦事官員添雇所需添雇價銀准其報領在臺供差官兵等應分別給予口分仍由該將軍等稽察遇有認真辦理或貽誤不齊等情隨時奏請勸懲至進取伊犁應由何路前往亟應設法安臺官兵過境時除照例支給外並令蒙古旗戶多備牛羊柴草按照時價賣給官兵以資接濟儻該官兵勒索陵虐准其稟報該管之

將軍等參辦哈爾尼敦等處勻撥官兵分紮聯絡等語著理藩院
定安慶春奎昌榮全多布沁札木楚文碩張廷岳阿爾塔什達按
照該王大臣所奏詳細情形悉心覈議奏明舉辦該將軍都統大
臣等所屬蒙古旗界應設之臺向歸何旗安設者並著繪圖貼說
詳細奏聞其應籌各臺經費一併覈實奏請撥用另片奏榮全前
赴伊犁雖有路可通第關內外正路未通若以孤軍徑趨伊犁亦
非計出萬全等語此時伊犁既不可置爲後圖而進兵之後尤應
豫籌久遠著奎昌榮全多布沁札木楚文碩妥爲覈議奏明辦理
原摺片均著分別鈔給閱看將此諭知理藩院並由六百里諭令
定安慶春奎昌榮全多布沁札木楚文碩張廷岳阿爾塔什達知
之○丁未諭內閣鑲黃旗滿洲奏原任杭州將軍瑞昌次子續承
查有下落見由湖北巡撫派員護送到旗一摺續承著該旗帶領

引見○諭軍機大臣等蘇廷魁奏趕堵侯家林決口一摺據稱自蘭工決口後黃水穿運而行本年八月初間黃水異漲復由侯家林將民埝衝成缺口灌運入湖若不急籌堵築恐來年大汛盛漲沙泥俱下河湖全塞南路運道可虞擬趁水落歸槽趕將侯家林缺口堵合沮河一帶民埝一律改築官隄見已派員赴工先於口門盤作裹頭免再刷寬並將堵口築隄撙節確估奏請籌款興修等語東南運道關繫緊要自應亟籌堵築著喬松年丁寶楨按照所奏各節詳細查勘會商籌辦應需款項若干俟奏到後再行籌撥原摺均著鈔給閱看將此各諭令知之○諭杜嘎爾奏追剿賊匪情形一摺據稱達爾濟於八月十八等日在翁音河等處擊賊獲勝與奎昌等前奏大略相同惟畢畱圖廟內盤踞之賊已據張廷岳等續報於九月初三日乘夜向西竄逸此次杜嘎爾摺內所

稱探聞賊匪擾及哈沙圖等站旋於九月初二初四等日向西避
竄是否卽係畢雷圖廟竄出賊股抑係另股之賊著張廷岳查明
具奏達爾濟輕聽賊匪之言縱令已困之賊復行他竄貽誤戎機
厥咎甚重著奎昌多布沁札木楚杜嘎爾懷遵前旨查明實在情
形從嚴參辦毋稍諱飾杜嘎爾接奉疊次諭旨自己趨程前進著
卽督飭所部探明賊蹤實力剿辦毋任日久蔓延張廷岳亦當督
飭伯克瓦齊爾等會合兜剿並將庫倫防務嚴密布置以杜窺伺
昨據定安奏薩薩布患病未痊請假回旗其所部馬隊已飭侍衛
承德記名副都統成山統帶前進馳赴杜嘎爾軍營合隊該副都
統得此一軍兵力較厚本日據榮全奏於九月初四日啟程前赴
伊犁隨帶官兵僅止百餘名所有該署將軍前請由杜嘎爾軍營
抽調吉林黑龍江官兵各五百名吉爾洪額訥蘇肯統帶前進著

杜嘎爾遵照前旨迅速派撥剋日前往毋稍延緩將此由六百里
各諭令知之○諭劉長佑馮子材奏官軍圍剿竄匪殲除首逆並
拏獲內地要犯一摺越南匪首曾亞日於王大股匪剿除後復糾
黨竄踞上林社夷村經馮子材飭令劉玉成等帶隊圍剿立將賊
首曾亞日及匪目黃汶廣等誘擒正法股匪悉數殲除惟賴安粘
山東枚等處踞匪尙多卽著劉長佑馮子材檄飭副將陳得貴督
率所部勇丁扼紮北芹迅速會同上林社各軍分道攻剿一面咨
會越南官兵層層堵截務乘賊匪勢孤之時迅將東路逆氛掃蕩
卽行轉戰而西廓清夷境毋稍稽延內匪范三大陳安瀟籍隸欽
州暗勾水東左結之賊由賊中攜帶銀兩潛回原籍那天墟等處
並在西省上思州邊境招集無賴帶赴水東見經馮子材派弁前
往欽州大寺汛地面會同該署把總黃紹功將陳安瀟拏獲正法

惟范三大聞風免脫著瑞麟劉長佑馮子材嚴飭各該地方官文武會同派出員弁一體嚴密查拏務獲毋任漏網將此由五百里各諭令知之○庚戌諭軍機大臣等李鴻章奏遵旨籌派曹克忠赴陝接統銘軍各摺片曹克忠接統銘軍既據李鴻章奏尙無不相宜之處卽著傳諭該提督迅速來京陛見所請派令辦理肅州一帶軍務准其專摺奏報之處著俟曹克忠陛見後再降諭旨原摺片均著畱中將此由四百里諭令知之○壬子賞五城貧民棉衣銀○引見原任杭州將軍瑞昌子閒散續承得旨著以六部主事用○癸丑諭軍機大臣等李鶴年奏查李世忠在固始境老樓地方居住築成一寨附近又築四寨寨內私藏槍礮前數年曾有招畱張總愚之叔張特賸任柱之弟任汶及息縣巨捻張昆情事其鑄造小錢擅殺平民各節亦皆確實請飭英翰妥速辦理以申

國法等語國家仁育義正一秉大公李世忠既已保全於前此時自不能追究既往遽予刑誅如見在實有招納叛黨謀爲不軌實據卽應密速掩捕明正其罪以遏亂萌曾國藩向有遠見於李世忠平日行爲知之最稔該革員見在舉動想該督亦必隨時查察豫爲之防此事究應如何辦法著斟酌機宜密速覆奏張特賡任汝張昆等是否尙在李世忠寨中抑已逃匿他處卽著英翰就近密查一面知照曾國藩一面據實奏聞此節爲招集亡命確據必應切實查明以定罪狀英翰於此事亦能隨處畱心並著與曾國藩密慎妥商固不可有心文致亦不可稍涉疏虞此中操縱機宜該督撫等諒必能籌畫盡善也原摺均著鈔給閱看將此由四百里各密諭知之○乙卯諭內閣劉岷奏拏獲滋事首要各犯訊明正法一摺湖南益陽等處滋事首逆劉道美何春台二犯經劉岷

飭屬嚴拏劉道美潛匿益陽林子口白馬寺內已革守備申大發帶領團勇馳赴該處立將劉道美擒獲其竄犯龍陽逆匪劉子訓王友濱亦經該撫飭屬緝獲均已訊明正法何春台一犯仍著嚴緝務獲毋任漏網拏獲逆首之已革藍翎都司銜龍陽縣城守營守備申大發著開復守備原官並藍翎都司原銜以昭激勸已革益陽縣知縣黃應詒辦理既多未善被參後仍復不知愧奮著不准畱營永不敘用○丙辰諭軍機大臣等成祿奏肅逆東竄官軍堵截獲勝並該逆分股出關情形一摺肅回東竄高臺撫彝一帶經成祿派兵堵截斃賊百餘人復密飭兵勇遏其歸路又斃賊數十名該逆遁歸肅巢分股出關一向西竄往安敦玉等處一由北套竄去成祿見咨綏遠城將軍檄飭各臺豫爲堵禦一面飛飭關外三營相機截剿卽著該提督嚴飭各軍勤加偵探遇賊卽擊保

衛民生母稍疏懈逆股既竄向北套深慮擾及草地復肆蔓延著
定安徽飭在防兵勇實力堵遏並將阿拉善旗各臺站妥籌防範
毋稍疏虞張曜見駐甯夏並著分撥隊伍確探賊蹤攔頭截擊盡
殄逆氛左宗棠仍催徐占彪迅赴肅州將該處賊巢一律掃蕩淨
絕根株庶關外地方不至再遭蹂躪於大局實有神益將此由六
百里諭知左宗棠定安成祿並傳諭張曜知之○論文麟景廉伊
勒屯奏探聞帕夏已赴南路烏魯木齊逆首馬仲如果真心向化何
回出關滋擾情形各一摺烏魯木齊逆首馬仲如果真心向化何
以於文麟等發去諭紙後久無回信及孔才行抵昌吉仍復率黨
撲攻其爲詭詞乞撫另蓄詭謀已無疑義文麟等務當督率各軍
妥籌防剿不得再行議撫致爲該逆所紿前因俄入代復伊犁並
有進規烏魯木齊之說諭令景廉酌帶兵勇規復烏魯木齊免落

他人後著並令左宗棠由西征糧臺內先行借撥銀十萬兩迅解景廉軍營俾應亟需見在該城回情反覆亟應迅速進剿以赴事機著景廉懷遵前旨剋日帶兵啟程節節進取將烏魯木齊及早收復庶聲威較壯鄰國不至生心於大局實有裨益帕夏不在吐魯番候信遽赴南路是其歸順之說殊不足信文麟等務當相機妥辦不可墮其計中如果真心投順交出城池屆時再由該大臣等奏明辦理陝回大股勾結肅逆出關滋擾攻陷安西協屬之布隆吉爾橋灣各堡並攻撲安西敦煌城池雖經兵勇擊退而賊股麇集來去靡常難保不時出肆擾左宗棠前奏派徐占彪十二營前赴肅州諒早拔隊西進著飭該提督分撥隊伍相機協剿毋任該逆再行出關肆擾並將肅州防剿事宜妥爲籌辦徐占彪到肅後成祿著卽懷遵前旨整隊前行與景廉會台規取烏魯木齊毋

稍濡滯署都司張大倫謝景孝靖邊前營營弁齊振文均著先行
摘去翎頂以示薄懲將此由六百里各諭令知之○丁巳以孟冬
時享太廟上前期親詣行禮○是月豁免湖南晃州廳被擾
上年民欠錢糧蠲免山東濮州等二州縣被水民借牛具籽種銀
並賑荷澤等十三縣被水災民